

TEZĂUR LITURGIC

18 AUGUST

ACATISTUL SF. MUCENICI FLOR ȘI LAVRU DIN ILIRIA II



MOSCOVA, 2000



АКАФИСТ СВЯТЫМ МУЧЕНИКАМ ФЛОРУ И ЛАВРУ

Кондак 1

Избранныи чудотворцы и воины Христовы, ко Господу о всем мире молитвенницы, восхваляем вас любовью, страстотерпцы святии Флоре и Лавре. Вы же, яко имущии дерзновение ко Святей Троице, предстательством вашим от всяких напастей нас свободите, да благодарственно вопием вам:

Радуйтесь, святии мученицы Флоре и Лавре, рая Христова цветы прекраснии.

Икос 1

Ангели земнии и человецы небеснии явистесь, святии мученицы Флоре и Лавре, егда озарившесь светом истиннаго богопознания, яко агнцы чистии страдания и муки претерпели есте, подражающе Агнцу Божию, вземлющему грех мира и пострадавшему даже до смерти, и сподобистесь вечнаго предстояния у Престола Всемилостиваго Спаса, идеже вы мольбы приносите за любящия и и чтущия вас. Сего ради торжествующе любовью Божественную память вашу, восхваляем вас:

Радуйтесь, чада благословенная Отца Небеснаго; радуйтесь, братия по плоти, веру истинную познавшии.

Радуйтесь, всем сердцем Господа возлюбившии; радуйтесь, душу свою за Него положившии.

Радуйтесь, прелести мира сего отвергшиися; радуйтесь, непорочнии агнцы стада Христова.

Радуйтесь, Бога истиннаго дерзновеннии проповедницы;

радуйтесь, в вере Христовой верным утверждение.

Радуйтесь, даже до крове во исповедании Христове пострадавшии;

радуйтесь, славою и честью от Владыки Христа увенчавшиися.

Радуйтесь, светильницы пресветлии, просвещающие души наша;

радуйтесь, яко во всей Церкви Божией имена ваша прославляются.

Радуйтесь, святии мученицы Флоре и Лавре, рая Христова цветы прекраснии.

Кондак 2

Видя Господь пагубу душ человеческих, идолослужением языческим омраченных, по неизреченному человеколюбию Своему восхоте призвати вас, святии мученицы Флоре и Лавре, в служение Богу истинному, да благовестите

людем Евангелие Христово, словом и делом наставляя их богоугодно пети всех Творцу: Аллилуиа.

Икос 2

Разум Божественный озари вас, Флоре и Лавре, егда благочестия хранители Прокл и Максим не токмо каменосечней мудрости вас научиша, но на камени веры Христовы добре утвердиша, на немже неотступно даже до конца пребысте, со страхом Господеви работающе и наставляюще верою души труждающихся с вами. Сего ради молим вас, не оставите убо благодатною вашею помощию всех песнословящих вас сие:

Радуйтесь, в трудех от юности воспитаннии;
радуйтесь, дарованный вам талант умножившии.

Радуйтесь, от святых мужей Прокла и Максима художеству каменосечному наставленнии;
радуйтесь, вере христианстей и богоугодному житию от них наученнии.

Радуйтесь, Христу последовавшии верою;
радуйтесь, крест Его, яко ярем, взявшии.

Радуйтесь, девства и чистоты хранители;
радуйтесь, Духа Святаго сосуди избраннии.

Радуйтесь, сеятели христианскаго благочестия;
радуйтесь, искоренители языческаго нечестия.

Радуйтесь, яко светильник, горяй во тьме,

языком светившии;
радуйтесь, светом вечным на Небеси осияннии.
Радуйтесь, святии мученицы Флоре и Лавре, рая
Христова цветы прекраснии.

Кондак 3

Сила Вышняго утверди вас, егда правитель
страны языческия призва вас ко устройению
краснейшего храма богом еллинским. Вы же,
святии, зодчии явистесь не токмо земнии, но и
духовнии, ибо иной храм нерукотворенный
созидашесь труды вашими: мнози бо люди
страны тоя, проповедию вашею наученнии,
истиннаго Бога познаша и Тому Единому
навыкоша пети: Аллилуиа.

Икос 3

Имуще твердую веру в сердцах ваших, Флоре
преблаженне и Лавре преславне, небоязненно
отыдосте из отечества своего во страну чуждую
и тамо апостольское служение восприяли есте:
людие, во тьме и сени смертней сидящи,
проповедию вашею светом Евангелия
озаришася; вы же, святии, в пощении и
молитвах пребываєте, днем делание творя,
нощию же моляся и цену за труды своя
вземлемую нищим раздаваєте. Сего ради вас,
яко проповедников Христовых ублажаем, со

умилением зовуще вам сице:

Радуйтесь, искуснии церковных зданий
строители;

радуйтесь, нивы Господни делатели
трудолюбивии.

Радуйтесь, ангельскому житию на земли
поревновавшии;

радуйтесь, образ любви и веры нам показавшии.

Радуйтесь, христианскаго благочестия
последователи;

радуйтесь, заповедей Христовых исполнители.

Радуйтесь, Евангелия Христова благовестницы;

радуйтесь, веры православныя поборницы.

Радуйтесь, тьму язычества прогнавшии;

радуйтесь, светом боговедения многих
просветившии.

Радуйтесь, истиннаго Бога святии служители;

радуйтесь, яко вами имя Божие прославляется.

Радуйтесь, святии мученицы Флоре и Лавре, рая
Христова цветы прекраснии.

Кондак 4

Буря искушений найде на вас, егда отроку, на
делание ваше взиравшу, камень, отскочив,
удари во око и изби е. Отец же отрока,
идольский жрец Мемертин, видев
окровавленное лице сына, устремися на вас, со
многими хулы, желая избити вас. Вы же,

делатели святии, кротостию злобу победили есте, обещающе исцелити око сыну его вскоре, на Господа упование свое возложивше и воспевающе Ему благодарственную песнь: Аллилуиа.

Икос 4

Слышав словеса ваша кроткая и утешительная, Мемертин отпусти с вами сына своего. Вы же, угодницы Божии, поясте юношу на ночь в храмину свою и начасте учить его познанию истиннаго Бога. И глагола юноша: «Аще око мое будет, каково бе прежде, веровати буду и поклонюся Богу вашему». Тогда востасте вы, святии, и начасте со слезами молитися к Богу, о исцелении и просвещении не точию телеснаго ока, но и духовных очес юноши. Темже вере и дерзновению вашему дивящися, восхваляем вас сице:

Радуйтесь, злоречие Мемертина ни во что же вменившии;

радуйтесь, злословящаго вас благословившии.

Радуйтесь, оружием смирения и щитом терпения себе вооружившии;

радуйтесь, смирившемуся нас ради Христу усердно раздражавшии.

Радуйтесь, братия не токмо по плоти, но и по благодати Христа Сына Божия;

радуйтесь, милости и сострадания исполненнии.
Радуйтесь, бедствующим скории помощницы;
радуйтесь, заблудших на путь правый
наставницы.

Радуйтесь, святии предстатели и молитвенницы
наши ко Господу;

радуйтесь, болящих врачеве благодатнии.

Радуйтесь, образ нищеты духовныя в себе
показавшии;

радуйтесь, истиннии Евангелия Христова
последователи.

Радуйтесь, святии мученицы Флоре и Лавре, рая
Христова цветы прекраснии.

Кондак 5

Боготечныя звезды явистесья, страстотерпцы
святии, яко два велика солнца землю
освещающии и семена веры Христовы в сердцах
многих язычников посеявшии. Тако и отрок ,
егоже око молитвами вашими здраво
сотвористе, истиннаго Бога позна и Тому в
радости возопи: Аллилуиа.

Икос 5

Видя чудо велие, в сыне явленное, отец его
Мемертин идольскаго служения отвергшеся,
истиннаго Бога прослави вкупе с сыном своим.
Вы же, страстотерпцы святии Флоре и Лавре,

имуще помогающаго вам в делании Ангела Божия, совершите зиждемый храм, обычаи идольския искореняюще, язычники же многия к вере Христовой обратили есте. Сего ради примите от нас сие благодарственное славословие:

Радуйтесь, око ослепшему юноше отверзшии;
радуйтесь, от Господа даром чудотворений на земли просиявшии.

Радуйтесь, языческаго жреца ко Христу обратившии;

радуйтесь, и сына его к вере истинней приведшии.

Радуйтесь, славнии в бедах заступницы;
радуйтесь, милости податели предивнии.

Радуйтесь, светильницы, пред Богом горящи;
радуйтесь, о душах наших теплии молитвенницы.

Радуйтесь, Божественныя мудрости исполненнии;

радуйтесь, преславнии христиан помощницы.

Радуйтесь, Господеви верно послужившии;

радуйтесь, угодницы Божии, на Небеси и на земли прославленнии.

Радуйтесь, святии мученицы Флоре и Лавре, рая Христова цветы прекраснии.

Кондак 6

Проповедников богопросвещенных и апостолом Христовым подражателей видим вас, двоице святая, благодать бо Господня излилася чрез вас и воистину были есте многим людем проповедницы веры истинныя, приводяще их к познанию Христову и научающе сердцем и усты воспевати Спасителю мира: Аллилуиа.

Икос 6

Возсия свет неизреченныя славы небесныя и исполнися сияния чуднаго храм, руками вашими, Флоре и Лавре, созданный, в немже постависте честный Крест к востоку и сотвористе всенощное славословие Христа Бога нашего. Людие же, свет той видевшие, вся кумиры идольския, для храма того уготованныя, сокрушиша, взывающе вам тако:

Радуйтесь, мрак идолослужения рассеявшии;
радуйтесь, светом богоразумия нас озарившии.
Радуйтесь, языческаго нечестия обличители;
радуйтесь, путь жизни истинныя нам показавшии.

Радуйтесь, яко молитвами вашими благоухания дивнаго церковь исполнися;
радуйтесь, яко злосмрадие вражие упразднися.
Радуйтесь, тьму прелести многобожия

отгнавшии;
радуйтесь, звезды, светом истины сияющия.
Радуйтесь, чудес источницы преизобильнии;
радуйтесь, чудесы вашими нас утешающии.
Радуйтесь, неусыпнии за нас молитвенницы;
радуйтесь, в вере истинней нас утвердившии.
Радуйтесь, святии мученицы Флоре и Лавре, рая
Христова цветы прекраснии.

Кондак 7

Хотя явити миру славу мучеников за веру,
благоизволи Господь предати вас, храмоздатели
святии, и всех молившихся с вами, в руки
мучителей; князь бо, уведевший о сокрушении
идолов, лютою яростию исполнися и осуди всех
уверовавших во Христа на сожжение, вас же,
Флоре и Лавре, бив жестоко, посла ко игемону
Иллирии Ликиону. Темже страдания ваша
ублажающе, благодарно поем о вас Богу:
Аллилуиа.

Икос 7

Новая и лютая мучения уготова вам игемон
Ликион, егда возвратистесь связаннии во
отечество свое. Вы же доблественне
претерпевше вся, мужество и непоколебимую
твердость во исповедании веры Христовы явили

есте. Тогда повеле игемон ввергнуть вас, святии мученицы, в студенец глубок и землею в нем засыпати. Темже мы, благоговейне воспоминающе страдания и мученическую кончину вашу, с любовью зовем:

Радуйтесь, на предлежащий вам подвиг с радостию востекшии;

радуйтесь, во Иллирии, яко солнце пресветлое, страданьми возсиявшии.

Радуйтесь, яко злато в горниле мучений искушеннии;

радуйтесь, силою Христа Царя во страдании укрепляемии.

Радуйтесь, мучения за Христа мужественно претерпевшии;

радуйтесь, жертвы непорочнии Святей Троице явившиися.

Радуйтесь, яко возлюбисте жизнь вечную паче временныя;

радуйтесь, течение жития мученически скончавшии.

Радуйтесь, Ликиона и слуг его терпением удивившии;

радуйтесь, венец победный от Христа приявшии.

Радуйтесь, любовь вашу ко Господу кровию запечатлевшии;

радуйтесь, к лику добропобедных мученик

сопричтении.

Радуйтесь, святии мученицы Флоре и Лавре, рая Христова цветы прекраснии.

Кондак 8

Странницы и пришельцы по апостолу явистесь на земли, страсотерпцы святии, дольняя презирающе, горних взыскующе, и братскою любовию соединенныя, мученическую смерть приясте. Темже и нам помогите вашими молитвами добродетельное житие возлюбити, воспевающе Богу ангельскую песнь: Аллилуиа.

Икос 8

Всею душею и всем сердцем возлюбивше Христа, братие блаженнии, и по кончине вашей не оставляете нас, яко Божиим изволением по летех мнозех обретени быша святыя мощи ваша и положени быша в Константине граде во обители Вседержителя, источающе множество чудес всем с верою к вашему заступлению прибегающим и взывающим вам тако:
Радуйтесь, в Горний Иерусалим пресельшиися;
радуйтесь, с лики небесных сил торжествующии.
Радуйтесь, яко и по кончине вашей нас не оставляете;
радуйтесь, от Горних высот на помощь нам

приходящими.

Радуйтесь, яко мощи ваша нетлением на земли прославишася;

радуйтесь, миро благовонное исцелений источающими.

Радуйтесь, велие дерзновение ко Христу обретшии;

радуйтесь, страстотерпцы Христовы, в чудесех прославлении.

Радуйтесь, пред престолом Божиим миру грешному предстатели;

радуйтесь, неусыпнии стражи нашего спасения.

Радуйтесь, милосердия и любви к людем сосуди неисчерпаемии;

радуйтесь, ко Отечеству Небесному вернии наши путеводители.

Радуйтесь, святии мученицы Флоре и Лавре, рая Христова цветы прекраснии.

Кондак 9

Всякими знаменми и чудесы прослави Господь вас, богоизбранная двоице Флоре и Лавре, дадеся бо вам благодать недужныя врачевати, обидимыя заступати, в бедах сущим помощь подавати. Темже благодарно вас славим и Богу, прославльшему вас, поем хвалебную песнь: Аллилуиа.

Икос 9

Ветии мира сего не возмогут по достоянию восхвалити добродетели и воспети славу, уготованную святым во Царствии Небеснем, егоже наследницы явистесе вы, святии мученицы Флоре и Лавре. Сподобите и нас сопричастницы сея славы быти, угодницы Божии, и неотступни будите нам помощницы, вся благая дарующе нам вашими молитвами, да умиленно зовем вам сице:

Радуйтесе, яко о славе вашей собори святых возвеселишася;

радуйтесе, роду христианскому присное утешение.

Радуйтесе, яко молитвами вашими Владыку всех умилоствляете;

радуйтесе, вся благая прошения наша исполняющии.

Радуйтесе, яко сущим в бедах и напастех избавление подаете;

радуйтесе, скорбящих и унывающих благодатнии посетители.

Радуйтесе, яко о спасении всех людей православных ко Христу руце воздеваете;

радуйтесе, святии врачеве, болезни наша исцеляющии.

Радуйтесе, грешники к покаянию обращающии; радуйтесе, скории врачеве душ и телес наших.

Радуйтесь, скорби наша в радость претворяющие;
радуйтесь, реки чудес и дарований духовных.
Радуйтесь, святии мученицы Флоре и Лавре, рая Христова цветы прекраснии.

Кондак 10

Спасти хотяще от бед и напастей Русь Православную, вси сынове российстии от лет древних проповедуют благодатную помощь вашу во бранех, святии мученицы Флоре и Лавре, яко во ем христолюбивым присно на враги поборствуете и победы даруете на иноплеменники, воюющия на нас и на веру православную. Сего ради по долгу прославляюще вас, благодарно поем Богу победную песнь: Аллилуиа.

Икос 10

Стена и заступление, угодницы Божии Флоре и Лавре, явистесь в годину скорби страны нашея, егда изыдоша воини Великаго князя Димитрия Донскаго в день памяти вашея на битву с агаряны, и победу на поли брани Куликове одержаша. Темже и ныне сынове российстии с верою к вам приступающе, приемлют ходатайством и заступничеством вашим скорую

помощь и избавление от всех зол, воспевающе вас сице:

Радуйтесь, яко прославитесь в земли нашей многими чудотворении;

радуйтесь, России Богом даннии покровители.

Радуйтесь, Великому князю Димитрию

Донскому в битве с агаряны пособствовавшии;

радуйтесь, христолюбивому воинству его невидимии помощницы.

Радуйтесь, заступлением вашим от нашествий иноплеменных нас избавляющими;

радуйтесь, молитвенницы крепцыи за страну нашу Российскую.

Радуйтесь, воины Христовы непобедимии;

радуйтесь, благочестивых воинов в битвах укрепляющихи.

Радуйтесь, яко в нуждах благочестивым людем российским помогаете;

радуйтесь, от них с любовью прославляемии.

Радуйтесь, угодницы Христовы, народом российским возлюбленнии;

радуйтесь, яко и мы грешнии имена ваша с верою призываем.

Радуйтесь, святии мученицы Флоре и Лавре, рая Христова цветы прекраснии.

Кондак 11

Пение всеумиленное приносят вам людие русстии, издревле почитающии вас, яко покровителей коней и труда ямщицкаго, и многия храмы во имя ваше святое в стране нашей воздвигшии, идеже иконы ваши чудесы прославишася, пред ними же и ныне людие в вере утверждаются, к Небеси же сердца своя восхищают, воспевающе радостно Богу, дивному во святых Своих, ангельскую песнь: Аллилуиа.

Икос 11

Светоподательныя светильники вемы вас, страстотерпцы святии Флоре и Лавре, мученическою кончиною показавшии нам путь к незаходимому Свету Христу, ныне же престолу Божию предстоящи и мрак страстей и грехов наших молитвами вашими разгоняющии. Озарите убо от горних высот оледенелая сердца наша, просветите землю нашу светом веры Христовы и будьте вернии наши предстатели ко Господу, да мудрую двоицу Света умнаго, просвещение всем подающего, ублажаем тако: Радуйтесь, яко светом невещественным души наша просвещаете; радуйтесь, добродетелей ваших светом

осияннии.

Радуйтесь, яко звезды страну Российскую чудесы вашими осветившии;

радуйтесь, светильницы, души наша благодатию озаряющии.

Радуйтесь, яко мнози храми имене вашего землю нашу украсиша;

радуйтесь, яко храмы сия благословением вашим осеняете.

Радуйтесь, яко в них от бурь житейских волн спасаемся;

радуйтесь, яко сынове россиястии ходатайством вашим спасения сподобляются.

Радуйтесь, всех богоугодно жити хотящих мудрии наставницы;

радуйтесь, о любящих и чтущих вас предстатели.

Радуйтесь, яко Церковь Русская благоговейно вас прославляет;

радуйтесь, яко и ныне вернии к покрову вашему прибегают.

Радуйтесь, святии мученицы Флоре и Лавре, рая Христова цветы прекраснии.

Кондак 12

Благодать единения и братолюбия испросите у Господа отечеству нашему и всем людям православным, священная двоице

страстотерпцы святии Флоре и Лавре, и умолите Господа, да утвердившися в заповедех Его, вси вернии возлюбят друг друга и едиными усты и едином сердцем воспоют Спасителю нашему благодарственную песнь: Аллилуиа.

Икос 12

Поюще чудеса ваша и многое к страждущим милосердие, восхваляем труды и подвиги, ублажаем мученическую кончину, почитаем ходатайство и заступление ваше о всех требующих помощи, благодарим Господа, даровавшего Церкви Своей Святей дивных молитвенников и предстателей о нас грешных и со умилением зовем вам:

Радуйтесь, братие, друг друга искреннею любовью возлюбившии;

радуйтесь, зодчии, храм Духа Божественнаго в себе явившии.

Радуйтесь, Господу Славы ныне предстоящи;
радуйтесь, Пресвятя Богородицы избраннии раби и угодницы.

Радуйтесь, архангелов и ангелов достойнии собеседницы;

радуйтесь, мученическаго пресветлаго собора звезды сияющия.

Радуйтесь, яко со безплотными силами трисвятую песнь Богу воспеваете;

радуйтесь, яко со всеми святыми о нас грешных
Господу молитесь.

Радуйтесь, от враг видимых и невидимых стено
и ограждение;

радуйтесь, Церкви Православныя дивное
украшение.

Радуйтесь, яко память вашу вернии на земли
славят;

радуйтесь, яко имена ваша написана суть на
Небесех.

Радуйтесь, святии мученицы Флоре и Лавре, рая
Христова цвети прекраснии.

Кондак 13

О Божественная и светоносная двоице Флоре и
Лавре, добропобеднии мученицы, на Небеси
всегда Святей Троице предстоящи, вонмите
малому молению нашему и песнословию
смиренному, егоже милостивно приимше,
умолите всех Творца Господа избавити нас
скорбей и болезней временных и вечных и
сподобити нас со ангелы и всеми святыми во
Царствии Небеснем воспевати Богу победную
песнь: Аллилуиа.

Этот кондак читается трижды, затем 1-й икос
«Ангели земнии и человецы небеснии...» и 1-й
кондак «Избраннии чудотворцы...».

МОЛИТВА

Прехвальнии мученицы Флоре и Лавре, вас не земля потаила есть, но Небо прият вы, во еже быти вам молитвенники и предстатели о чтущих с любовью честную память вашу. Молитесь же за ны, трудолюбцы незлобивии, да подвигнет Господь и нас, в трудех и утеснении сущих, к деланию заповедей Его, да не токмо о пищи и питии, но и о еже како угодити Господеви попечемся; услышите печали и воздыхания наша, и да не озлобятся до конца души наша, но да возгорятся любовью братскою друг ко другу, да пребудем в мире и единомыслии, якоже и вы, самобратнии блаженнии. Наипаче же утвердите ны в вере святей и правей, юже имуще в сердцах наших, не устрашимся в поношении и унижении и, всяких обстояниих, имиже одержими есмы, но, яко испытание силы веры нашея с благодарением сие приимше, доброе исповедание соблюдаем, в немже и преждем от юдоли сей в вечное царствие Господа нашего, Емуже слава и держава во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
НЕБО